

摘藻堂四庫全書薈要

集部

欽定四庫全書薈要

集部

安陽集卷四十三

四十三

詳校官助教臣常循



欽定四庫全書薈要卷一萬四千二百十五

集部

安陽集卷四十

宋 韓琦 撰

制詞

中書試制詔三道

邊鎮節度使加同平章事制

限二百字
以上成

門下朕奉承先猷統理四海雖兩階之舞惟文德之內
修而十乘之行亦元戎之外倚向匪功名自立忠義無

渝負全師保勝之謀得守塞安邊之策則曷以委之扞
蔽假以綏懷仗節臨戎方號軍鋒之冠承天象極宜兼
鼎席之崇甄於爾勞蔽自余志用涓良日敷告廣朝具
官其儻不羣方毅無撓蘊沈謀而必斷持勇節而甚
高練鈴決之符兵韜盡達蹟詩書之府儒術兼優中外
迭更恪勤罔懈間者顧守方之要擇制閫之行以文武
兼備之才膺左右皆師之選輟于近著建以高牙而能
安輯封垂訓齊候伍申令惟信均饗必豐運籌先決於

惟中所賜率分於麾下無開生事之隙將成殄寇之勲
偉望益隆休聲日至朕代天理物制祿勸能惟功是圖
在賞奚吝是用即軍而頒命加寵以旌賢俾參三事之
聯實聳萬夫之觀於戲將相之任為臣極榮疆鄙之權
所寄良重吾恩甚渥汝報可知無煩訓辭惟自勗厲

中書舍人除御史中丞制

限一百五十字以上成

勅南臺風憲之重中執大夫之亞彈治非法表儀羣官
必取嚴明自修方重不撓者以稱其任我甄髦彥僉實

宜之具官某文雄學優材敏行潔深明當世之務兼蘊
幹時之謀而自砥節仕途奮庸朝路處議必當居官可
稱委之使煩盤根以別乎利器察其守道白璧無求於
厚瑕擢者擢于近署進處西曹專典命書且觀才業而
能發揮溫雅之號演明深厚之辭朝采益光吾訓增重矧
以編摩之暇間陳忠鯁之言誠存告猷事亦惇體宜繇
四禁之任往司三獨之權爾其振緝紀綱張大職業守
正則補于予治持祿則瘵于爾官務求厥中毋忝休命

誠勵風俗浮薄詔

限二百字
以上成

夫革文變薄者興治之大砥名礪行者為士之常故清
淨則化行端慤而名顯康世導俗率繇斯舉朕保宥黎
獻輯寧區域納上穹之佑衣前人之言以周文之小心
漢光之柔道惟兢惟業勤覽萬機曷嘗不惇本體元廢
奢長儉推行忠厚之教敦任廉良之人蓋將欲抑浮偽
之風崇禮讓之訓嘉與宇內同臻是塗然而人性易流
俗尚難一久安涵養之惠寔啟澆漓之源多行險以期

榮競擇利而安已人或有善蔽之而不言官或任權靡然而爭附婦姑求勝朋比相高苟茲蔽之弗悛實有邦之甚蠹是用特申明諭徧飭多方各宜履道求中飭躬希古罔沽譽以干進思首公而盡規官之修則上必聞效之實則名自至朝有祿位本觀賢才儻行已以毋邪在旌能而孰吝告于中外當體余言

王堯臣除翰林學士制

勅王者發號裁訓所以風四方而熙衆務也故前代贊

辭視草雖以名臣掌之而其任未著唐以文治始盛禁
林之選我朝因舊建職恩禮差峻須才而召儒者榮之
以爾具官王堯臣冲履夷懷清猷敏行言必可復而有
端士之目動率由禮而有古人之風彛者旌其藝文升
冠多士更集郡條之最久陪詞館之游使以煩而益精
語其進則無競而自迹其材美擢典命書敷余制以甚
明稽作者而奚媿覆刑讞則輕重皆當提京局則綱領
畢修稔于歲勞休厥朝論宜繇西省之祕進預北門之

直爾其蹈賢哲之範思職業之舉出令之始務切於事
機備對之間勿忘於毘正毋以文翰專為汝能往復茂
恩以永來譽

郭稹除刑部員外郎制

勅具官郭稹中臺憲曹掌天下刑讞分置郎屬許決衆
務今雖外領他局然職望尤峻非奏課之美者未嘗輕
授以爾操尚中立資性外和早富藝文實冠鄉選逮優
中辭等隨牒更仕奉已以廉著居官以幹聞治成均之

業而善誘後來讐麗正之書而多得前誤出貳郡條之
寄入參邦計之煩風力愈修盤錯盡解適稽官簿當質
歲成進陪司寇之聯尚贊理財之任祇若余命懋哉爾
勤

魏昭晒除防禦使制

勅國家嚴武備治軍行參設使名式過于外所以踵唐
舊而獎材臣也以爾具官魏昭晒柔謹自將和愿有守
早緣戚體之愛升預禁墀之聯煩局所更勞簿可錄鄉

嘉宣納之美擢司擯贊之職貳馬政以有蕃閱兵符而無濫遽形囊奏願假郡麾典輔藩之雄且稽於善教申先賞之勸宜責於後勤往被朝恩毋隳世伐

王克基除東上閣門使制

勅漢制謁者有僕射以統其屬今二閣置使通領擯贊之職若功次為久則序而升之以爾某官王克基性順而和行廉而固早繇勲戚之績寔服軒墀之列凡任于事率能其稱暨銓武材益集官最錄其勤舊優以褒遷

宜升左闈之宗更示橫班之寵勉修而效以對朕恩

龍昌期等授試國子四門助教制

勅益州進士龍昌期等夫舉高節顯儒行使聞者知善
必期報驩然有嚮道之心國之良教也以爾等學以為
己名不求達或治業有本而盡經府之奧或誨人甚廣
而為州塾所稱白首無違環堵自樂屬使輶之去復迹
鄉譽以來聞宜惇遠俗之風偕綴上庠之籍服余甄命
以克其終

夏隨除觀察使制

勅古之君天下者以幅員之廣慮耳目之所未究也故分道遣使舉吏之臧否候民之病利而達于上有唐庶察之選蓋其任也今職廢為官名品逾重非簡時傑賞舊勞則罔或命焉以爾具官夏隨器懷沉敏行實端方早圖世勲階藉禁列朕肇開儲邸擇相賓儀逮于纂承亟用甄擢而能勤劬自謹謙畏不矜精力一心局事毋曠掌武選則銓藻有叙統邊戍則綏御得宜間以親嫌

歸奉朝請方試才而思用爰先賞以勸功俾正觀風之名往莅作藩之寄噫銜寵則其悔必速修政則厥庸乃豐善宣教條用服予訓

李端愿除西上閣門使制

勅典禁閣之籍辨廷謁之儀寵建使名實甄材彥以爾具官李端愿操尚冲約業履淳篤襲世資而動守禮法居戚苑而行同寒素勤辦乃事孝聞於家會以歲勞宜有恩進爰崇官闈之秩兼厚沁園之親訓緝兵團仍茲

卷四十一
舊職爾其以已能思效以忠訓自修則百辟四方知朕
不私於賞也

吳有隣除駕部員外郎制

勅具官吳有隣國家推公以馭羣吏責實而張課法惟
後勤已效則前過可忘以爾早擢儒科久參朝序寔階
郎省出領郡符自抵憲條得原慶典降居筦榷之任用
推杖拭之恩省躬甚明祇局無懈念歲勞之克著稽賞
格以當遷進升司僕之曹且示懋官之訓體予甄錄更

務檢修

王果除諸司使制

勅具官王果以經藝之長升于仕版以法令之允寘彼
朝綏方任幹明之才式推竒正之學遂移閨籍更服禁
聯俾司邊壘之雄善撫兵屯之肅載稽勞簿優進寵階
宜欽增秩之恩勉著安民之效

江中立除祕書丞制

勅具官江中立國家用人之法必稽吏考之善否而升

黜之苟最有可稱則賞亦宜信以爾業文中第累勤莅
官擢參史觀之聯遠賦縣同之政屬周歲閏當較治能
即遷本承實寘通序宜思恪謹以副寵甄

高繼隆除諸司使制

勅具官高繼隆早服禁聯勤修吏最薦委典戎之任備
觀經武之能西垂制衝鈐策為重宜正使名之授往提
師律之嚴勉效爾為勿辜余獎

韓鑑除祥符縣主簿制

勅具官韓鑑早繇蔭補方限選條屬乃家嚴膺吾使任
顧蜀道之遠且有庇宗之祈惟赤邑之雄願承勺簿之
乏宜旌寵寄俾漸仕階

穆思齊除大理寺丞制

勅具官穆思齊曉城旦之書而升仕階宰縣同之政而
集官最薦章交上參應恩格廷尉之屬丞選甚清用疇
爾勞其報余賞

陳道古除大理寺丞制

勅具官陳道古早修門法來服仕階備丞率於卿聯幹財煩於京務職勞甚著課格當遷理官司平選屬為謹往處恩賞勤紹世風

柯慶文除著作佐郎制

具官柯慶文早決雋科薦居官次遠從州辟勤著吏能屢閱薦章來稱美課約史有貳於仕尤清信吾賞條旌爾成效

燕褒除大理評事制

勅具官燕褒以爾早緣蔭格參服仕塗預禮蒞之員最
成來上陪鄉棘之議恩陟宜優往踐榮階更圖爾效

李迪曾祖在欽贈太師制

勅王者躬郊廟之祀答神靈之休美莫敢專以明尊上
之義孝而能饗蓋達奉先之誠因是廣恩庶能知教矧
惟丞弼之舊方均左右之勞用舉徽章賁于曾世具官
李迪曾祖贈太師在欽冲懷弗競潛德甚高天爵之修
遂忘於君仕家善之積爰啟於孫謀是生忠實之臣荐

正鈞衡之位，擯辭台路，往殿國藩，宜乎渙號之文，特霽寵親之澤。維師命秩，飾壤推榮，英魄想存，尚克歆荷。

曾祖母潘氏追封魯國太夫人制

勅迺者，寶元冬仲景至，協辰有事，泰壇昭答，靈貺均慶。方夏漏澤，泉壤所以勸臣勞而惇孝治也。具官李某曾祖母潘氏，壺儀咸備，家範早修，謹婦道以可宗，監女圖而毋越。善祥有報，良嗣聿興，為時正人，作朕賢弼，適優賢於邦翰，屬展采於陽郊，增崇曲阜之封，姑慰幽塗之

魄

祖令珣贈中書令制

勅朕嚴祀紫壇祗裸清廟精意以感故瑞福永況慶澤
所被故幽明必通矧公台亮直之臣寵藩翰撫綏之寄
宜褒祖德載厚恩章具官李某祖贈太師令珣志行醇
深襟懷信實早升仕版進服朝朕當藝祖之開基指僭
邦而伐罪屢陳竒策簡在聖心計府商功邦財增羨郡
條賦政民瘼必蠲彌嘉異等之勞將圖不次之用位未

充量遽歎於云亡善及于孫果彰於有後薦登爰立之
任方倚于宣之良肆類克成顯親有典式正鳳池之拜
庶光馬鬣之封魂兮有知欽此優命

祖母白氏追封國太夫人制

勅郊報之重陟配有嚴朝渙所均上下咸暨推是及先
之寵存乎勸後之經具官李某祖母白氏德稟柔明性
惇淑茂嬪于令族綽有懿風惟慈德之流光祐孝孫而
興緒入為良輔謀必盡忠出殿大邦惠深及物祀儀方

舉慶典惟行宜旌祖妣之賢載易國封之大魂而不昧
服我恩休

祈福道場白文

伏以花雨稱祥適丁於令節貝文演妙虔奉於真詮爰
擇淨居式延開士贊物乘之利益助宸歷之鴻長伏惟
尊號皇帝陛下仁惠宅中睿明臨下謹天經而惇治設
神理以寧人畫象寬刑協敷於邦教斲雕興儉丕變於
民風屬端月之肇新願綿區之咸乂羣靈俱泰庶務交

修思與黎氓同均瑞福啟法筵於紺宇來實施於丹闈
集此勝因仰資盛旦皇帝伏願聖猷永茂皇緒寔昌慧
日破昏遐膺於煦育慈雲蔭物畢遂於蕃滋凡居普率
之間共洽熙平之化

祈福道場功德疏文

伏以金繩闢宇式見於莊嚴貝葉披文爰資於勝利屬
聖神之撫運顧景序之方春庶職熙康萬靈和樂順茲
佳節虔禮真乘修淨供以惟嚴輯善因而彌衍伏願覺

慈廣覆慧力周施錫無疆之休增延於睿歷演甚盛之
福普及於蒸民凡在幅員永符歸向

安陽集卷四十

欽定四庫全書薈要卷一萬四千二百十六

集部

安陽集卷四十一

宋 韓琦 撰

冊文

仁宗皇帝哀冊文

維嘉祐八年歲次癸卯三月癸卯朔二十九日辛未仁宗神文聖武明孝皇帝崩於福寧殿旋殯於殿之西階
粵十月戊辰朔六日癸酉遷坐于永昭陵禮也龍馭賓

天珠襦留殯萬方之軌同臻七月之期茲近法仗已嚴
靈輜未進風雲慘鬱以生悲臣妾涕號而思殉孝子嗣
皇帝臣曙接統承堯念親晞舜徘徊象物驚禁從以如
存推慕仙游致哀誠兮必盡繫臨奠以長辭蓋終天之
永恨乃命弼臣以文傳信其詞曰

惟宋受命與天無疆藝祖以武底寧四方神宗以文萬邦
一王真廟紹隆赫然其光逮夫仁宗益熾而昌厥生之初
上帝惟祐天日之表振古未覩色出圭章步嚴龍虎其俾

真人來綏下土元良之建七鬯是主寢門之間惕若文武
嗣訓之循纂承丕緒左右獻后以蒙自處大運歸乾獨化
陶甄進良黜姦始章聖權其仁如天其度如淵其仁伊何
得之自然草秀而茁蟲飛而翔尚不忍傷況吾民焉惠澤
之霑滂洋幅員物無不滋四十二年猗如天兮化工則全
其度伊何汪然莫際巨細必容默分誠偽臣在言職不知
忌諱時肆詆訐衆嫉狂易聖心怡然曰此忠義是也吾從
過焉何戾猗如淵兮是能致治明謹庶獄極于哀矜惟法

所在未嘗妄刑郡邑之吏責之詳平一失入罪無階顯榮
尊為天子以儉為貴崇尚清虛屏斥紛麗向緣不懌輔臣
入視殿幄蕭然茵衾故敝率用繒素了無文綺衆目驚嗟
上曰何喟吾之受用素止如是此民膏血焉敢妄費恭事
天地孝承祖宗九見圓丘再祗合宮大禘于廟親籍于東
服器精備染盛潔豐小次不御秉圭顛顛何必戶曉民胥
偃風取士之路務在至公十二臨軒策之必躬雋髦盡得
巖穴幾空有將有相曰功曰庸眇視三代吾其比崇北胡

之強西夏之獠時欲跳梁恣其貪嗜吾以威懷折其凶銳
兩堦搖尾從我羈餌百蠻梯航琛賫日至禮樂具修干戈
不試夫惟立嗣天下之基前世令王或牽以私事不前
定濱于亂危我出獨斷挺然不疑求賢于宗唯聖是知
神器之重其傳有歸廟社以安生靈以嬉迹其大公堯
舜之為昔在人上必有偏好或樂馳騁或喜征討或務
宴遊或專營造或通聲色或泥丹竈基奕之工擊拂之
妙有一于此下從而效噫吾仁宗澹無所樂曰吾好者

在勤政道日必旰晷惟先之紹間時弄翰或隸或草聖
帚之揮千竒萬巧去冬之暮清燕之間再闢天閣詔呼
從官親作飛白侍臣縱觀心合造化生成筆端書幅踰
百大均寵頌退坐羣玉行觴盡歡嗚呼哀哉賜墨尚濕
宸章未刊植壁斯虔遽有金滕之禱綴衣遂徹俄承玉
几之言嗚呼哀哉大變之來天傾地裂四海之慟風號
雨血兆民震駭其無生百辟冤呼而僅絕乘雲之遊兮
汗漫而自高持髯之慕兮僵仆而徒切因疑前會之非

常似與羣臣之敘訣嗚呼哀哉侯律云凜諏辰協元嚴
蜃路以方駕視羽幢兮始前池竹揜雉車旗飾鸞背朱
雀之通達指青龍之吉山關路長兮去復去宮車晚兮
還不還痛徹六宮兮莫如逝淚灑重瞳兮胡可攀嗚呼
哀哉寒日晝昏愁陰夜積卷晴霓於丹旒蕩霜波於素
帟哀笳玄咽六州之奏增悽駿嶽前瞻萬歲之聲何闕
大隧一扃幽堂永寂人間之恨空長帝所之歡豈極嗚
呼哀哉秦漢而下御邦子民屢越三紀纔聞數君其間

治亂以相駁否亨之不醇如仁宗享國之久而始終太
平兮彼安敢望吾之清塵生而無窮者厚載健而不息
者高旻惟至仁盛德與高厚之俱兮萬世巍然而不泯
嗚呼哀哉

英宗皇帝尊號冊文

維治平四年歲次丁未正月一日庚戌攝太尉具官臣
韓某與内外文武百寮諸軍將校藩衛牧伯郡縣長吏
藩夷酋長緇黃耆艾等再拜稽首上言臣等聞天道育

萬物而不責其報然飛走之微必時而有薦者以知其本也君德被萬寓而不有其名然臣辟之衆必崇而有號者以獻其誠也故報雖不責薦而知其本者天必享名雖不有號而獻其誠者君不違是以上下之情通而古今不能以易也恭惟皇帝陛下自然之性得堯之仁不聞而式紹文之聖總百行而無不備探六藝而無不達粵在宗邸德充而晦令聞莫遏四海繫心譬夫大明將升光氣前發萬目瞻望不可韜戢及乎膺受聖託纂

隆皇緒信默二祀動謹先法奉養長樂孝惟克諧內嚴
宮闈而細大必修外整紀綱而頽墜皆舉攬威柄以歸
已幹神化而獨運下暨鰥寡悲安其生至于昆蚊莫不
被澤其九族之睦也俾先乎知道其百揆之叙也本精
乎任人若夫延見邇臣咨訪不倦有虞之好問也抑損
浮費用度日約大禹之克儉也緝熙光明而德行以顯
周成之保邦也綜核名實而賞罰必信漢宣之圖治也
并會衆美嗣興太平故自舟車所通日月所照皆奉順

聲教無敢弗虔固足以恢四聖之闕休極百王之盛節者矣迺者肇裡吉土始見清廟祭而受福慶將逮下下之報上安可無述臣等所以合中外之志叩闈屢瀆請上不稱以形容於萬一而陛下持易之謙執道之契德貫二儀而不自滿功偕八世而無所矜沖然弗居可詔不下自是輿情鬱悒更相責誚以為睿聖之烈赫赫如此而不能發揚而增大之是不若飛走知本之著也今三朝之吉萬玉來會重譯有貢八音在廷臣等幸於此

時冀畢前懇封奏五上莫匪傾竭陛下猶惇諭數四不
得已而俞之夫道濟羣生而不言所利體乾也躬享大
命而若固有之膺厯也化成天下而輝光日親文也守
在四夷而兵革不試武也日用而百姓不知聖也親寧
而萬國以歡孝也臣等不勝大願謹奉玉冊玉寶上尊
號曰體乾膺厯文武聖孝皇帝伏惟陛下無前之蹟本
忘其名徇衆之欲勉而是承斯亦踵祖宗之舊而慰乎
夷夏之情惟持其盈以守其成壽考萬年以享其榮臣

某等誠懼誠忤頓首頓首謹言

英宗皇帝哀冊文

維治平四年歲次丁未正月庚戌朔八日丁巳英宗憲
文肅武宣孝皇帝崩於福慶殿旋殯於殿之西階粵八
月丁未朔八日甲寅遷坐於永厚陵禮也歷在而帝鼎
成則仙四海驚摧兮猶考妣之喪也羣臣號慕兮有衣
冠之葬焉哀仗初肅靈輶即前孝子嗣皇帝永念罔極
痛深所天覩象物兮如在挽宮車兮莫旋一奠之訣兮

既已悲霄壤之隔萬古之信今又將假文字之傳乃命
臣某繼之以言其詞曰

惟宋之興祀踰百年聖聖相授前義後軒於穆英宗其
承赫然嗣世惟五應期則千厥初在藩潛德固異惟善
吾樂惟學吾嗜朝夕詩書寤寐仁義顓心聖賢舉跬孝
悌官之否臧民之病利必詢而得不在康濟明哉仁廟
知子其至推堯之心乃命主器曰非所當駭然懇避悖
迫踰年始辭邸第高世之行實出文帝既紹統業以濟

以勤欲泰天下儉吾一身衣必屢浣食皆屏珍府有餘
積賜無橫緡損約邦用深虞害民比戶而化咸歸至淳
壺內之制有妃有嬪位號之等其詳可聞吾悉不備蕭
然禁宸侍左右者故宮幾人為治之本先乎睦親不愛
苑囿衆居以均大興學校羣心自馴首善之勸于何不
臻荷天之休所報惟慤承先之祐其事彌恪始見郊廟
陰慝前作霖靈累旬朝位皆愕謂宜改為言者交錯聖
心益堅夙夜祇若及期而祀景氣澄灼至誠之應老稚

歌樂庶政思又萬機必躬一令之細惟審而後下一言之善則沛然是從覽四方之奏率至於夜艾訪前殿之對動踰於日中協虞舜聰明之聖盡漢宣綜核之公好文之盛前無比宗籍兵之廣寓之在農既恢隆於素教又振宣於武功於是西之悍羌北之強貊威德所加望風奪魄陰繕戎備歛藏貪螫奔走間者伺吾策畫惟固結於盟誓幸保全於沙磧若使天錫洪休壽鍾遐厯則累世之敵不數期而盡更二虜之驕有一朝而掃迹奈

何歲俯經於再閏年未借於不惑帝鄉甚邈遽樂白雲
之遊路寢斯嚴忽預彤裳之冊得非嗣聖當發興符有
開啟闔規於厥後俾大治於將來太平之功既遺已而
不有億兆之衆徒訴天而盡哀嗚呼哀哉違豫之來憂
民不替蠲賦恤災寬刑霈惠親揮宸筆以定儲位明聖
知之在先俾羣情之大慰謂勿藥兮宜瘳何與齡之終
戾嗚呼哀哉太筮諏吉蕭辰正秋下廣內以將旦即大
升而弗留臣庶攀慟風雲慘愁背紫臺之業業颺丹旒

之悠悠萬乘銜悲睇斜暉之莫返六宮灑泣雜暮雨之
難收嗚呼哀哉榮圃宵嚴汜闕朝啟登嶺道之縈回瞰
鞏郊而迤邐池魚輕躍於帷幰薤露淒流於心耳氣暝
緱山陰凝洛水方開萬歲之阡已湊諸侯之軌姬媵素
寡何須銅雀之為珠玉弗藏詎有金鳧之侈嗚呼哀哉
會聖臨右未昭峙旁侍仙遊之縹緲之帝所以軒翔名
素在於真錄迹空留於壽堂百年之間自比軒臺之畏
肅九疑之下幾瞻耘鳥之飛揚德固不朽慶方大昌惟

英主之號自我而獨得兮宜與天而共長嗚呼哀哉

安陽集卷四十一

欽定四庫全書薈要卷一萬四千二百十七

集部

安陽集卷四十二

宋 韓琦 撰

祭文

代開封知府諸廟謝雨文

維某年某月某朔某日具官某謹以清酌庶羞之奠致祭於某神粵自涼秋以來嘉澍未洽惟宸衷之在念顧稽事以為虞式是靈祠莫茲神壤奉吉蠲而致禱冀聰

直以垂休而神上符宵旰之懷下慰編齊之望會風期
於少女驅雲族於大山曾未崇朝遽均和澤壤久輟耕而
相賀祠官霑服以言旋濟旱歲以作霖畢蘇民察兆豐
年而為瑞協助聖猷爰被詔於發中俾涓辰而報貺用
陳馨薦祗答蕃釐諒精意之攸歆固嘉應之斯在尚饗
揚州祭聖母祠祈雨文

維慶厯六年歲次丙戌某月某朔某日具官某謹以清
酌之奠昭告於聖母之靈某聞之于詩曰旱既太甚靡

神不宗則知古人閔雨之際不愛牲幣凡神能福于民而為民之所奉者皆得索而祭焉今歲夏季以來境內不雨穡人狼顧以田為憂長民者亦嘗設壇禱龍歎祠求神齋恪之誠不為不至方靈應有答而民望未厭是用陳茲薄薦乞靈於神神其體斯民所奉之心示神能福之之意廣敷陰施惠此一方使時澤沛然年穀大獲則民知神德不謂無靈尚饗

諸廟祭文

維慶歷六年歲次丙戌某月某朔某日具官某謹以清酌庶羞之奠敢致祭於某神古有八蜡之祭以記四方若其方年不順成則蜡祭不通豈特使民謹於用財抑亦明神不苟受其報也今歲境內大旱民心顛顛有望於神而田禾卒不救守臣不敢循為蜡之義而廢神之祀是用舉舊典申薄薦神其歆此蠲潔無使來歲復失民望而重為愧尚饗

北嶽祈雨文

維皇祐元年歲次己丑六月壬戌朔十四日乙亥具官
某謹遣屯田員外郎通判軍州事游開以清酌之奠敢
昭告于北嶽安天元聖帝惟神享有常嶽視帝而祀故
距河而北凡民有水旱疫癘之災則歸心于神謂神主
于我必轉災而福之某幸為州于廟祠之下每旦開日
則思有以濟于民報于君以不愧于神雖然不敢獨私
一郡而邀神之福竊惟國家視天下以河朔為根本去
歲雨水為大沴民大半以饑死天子宵興盱食哀而恤

之賴蠶事既登麥秋有成捐瘠之民粗有生意而涉夏
不雨旱氣日甚民心嗷嗷以穀為虞天子聞之不得不
重貽北顧之憂某是敢以北民所歸之心且道天子仁
聖慈愛之德弗私所治而告虔于神神其振激威靈指
呵雷電霈乎嘉澤潤我民疇使兩河間普洽西成之望
則神上以寬九重之焦勞下以副萬民之歸饗巍巍廟
食與昊天齊其稱謂宜哉尚饗

北嶽祈雨文

維皇祐二年歲次庚寅三月戊子朔五日壬辰具官某
謹以清酌之奠敢昭告于北嶽安天元聖帝某聞天之
為道也惟民善惡而禍福之然推其仁於福則所任者
多於禍則有所不忍焉神之為靈也能謹其所以禍福
而協天之仁者也比歲以來河朔之民罹大饑饉幸而
全者無幾某為治祠下行二暮矣夙夜祇慄不敢慢其
政以干神禍每春夏之交水旱萌沴穡人駭憂必請救
于神而神應之夫豈守臣一冥禱而能感于神哉誠蚩

蚩之民無大罪惡天與神哀其窮不忍終其禍而致然也今歲方春而羣陰用事靈風晝昏陽氣迫而未宣雨意兆而復收農力于田惟歲是虞豈天與神仁于任福而不忍禍之之意耶神其驅叱癘妖奮示威德霈然施澤俾遂有年則民知神休孰不思報尚饗

北嶽祈雪文

維皇祐二年歲次庚寅十二月某朔某日具官某謹以清酌之奠敢昭告于北嶽安天元聖帝大河之北比歲

不登神知之矣今又入冬以來雪不時降果數之然耶
則否泰宜有以相返政之致耶則蚩蚩之民何罪此人之
所以疑天與神不預人事者正謂是也惟神作鎮于北助
天成化宜發天之德示神之明早霈時澤慰民望而銷
沴萌以釋人之所疑誠大惠也不然北道之民全其生
者無幾矣天晝夜而不息胡為哉神之祀孰供乎尚饗

北嶽謝雪文

維某年某月某朔某日具官某謹以清酌庶羞之奠致

祭於北嶽安天元聖帝近以冬候將終時雪不降重困
之民比屋愁歎守臣慙政之缺察民無罪輒遣屬吏走
祠下合衆心之所憂上訴于神神惻然憐之翌日降雪
闔境之內無不允洽愁歎之民以拊以舞夫神之化冥
冥然民固有疑之者及其應之昭也則靡然歸之無疑
矣況尤影響之速乎宜其望而祀廟而食有國尊奉與
天無窮謹擇良日具牲醪以修報惟神始憐之終成之

尚饗

北嶽謝雨文

維皇祐三年歲次辛卯三月某朔某日具官某謹以清酌庶羞之奠致祭于北嶽安天元聖帝某覽載籍見堯湯水旱之事而說者多歸之天數以為雩禱之禮蓋有國家者徇民志而安下情其實不可求也乃有一守令自暴一御史決獄而能上動天意應時注雨則於二者之說不能無惑焉今則判然無惑矣某自承詔來定會河朔歲災比年雨不時降為民之守察民之窮而無所

訴也則必走僚屬乞靈于嶽祠之下或三日至五日神
應響答甘澤大洽故北道歉殍而定獨小康神貺多矣
今歲自正月至三月不雨民復震駭顧蚩蚩者無告獨
神之有以訴也於是載加精禱幸紓民患既而雲容聚
散連日晝陰至七日雷電始發一雨告足則知至誠者
必能感神而神必能為民之福也又何惑焉謹擇日具
牢酒以為報惟神陰佑終賜有年尚饗

北嶽祈雪文

維某年某月某朔某日具官某謹以清酌之奠敢昭告
于北嶽安天元聖帝某聞四方之民水旱豐穰皆繫守
政之善否某常信是說至定而後知不獨繫于政乃有
嶽鎮之神陰主一方能驅斥災沴而降民之福某非才
守定行五歲矣政之不善宜有以動天變而及斯民何
乃北道比歲大災而定獨小康得非守政雖不善而神
能佑民而福之乎昭昭矣今歲農疇大穰比戶嬉樂而
時雪過期未有嘉應此守臣所以思政而自懼神所以

愛民而施福之時也神其宣揚威靈振激和氣使盈尺之瑞早慰民望則民心歸嚮不在他祠尚饗

北嶽謝雪文

維皇祐三年歲次辛卯十二月戊寅朔二十六日癸卯具官某謹以清酌庶羞之奠致祭于北嶽安天元聖帝近以時雪稍愆未充歲望咎政之失惟民是虞亟禱于神尚期鑒佑果蒙靈答若響應聲雖農畝尚冀霑霈而民心大已開釋謹遣大理寺丞簽署節度判官廳公事

夏倚躬致菲薄以修報禮惟神念此一方素垂蔭護更施惠澤以永神休尚饗

北嶽再祈雪文

維某年某月某朔某日具官某謹以清酌之奠敢昭告于北嶽安天元聖帝近以入冬以來時雪未洽累遣掾屬乞靈于神亦既踰旬尚稽報佑豈守臣愛民之心未至而事神之意弗虔乎夙夜究思罔克自處今請通判軍州事闔某躬致前懇禱于祠下惟神察誠之勤慰民

之望早垂嘉應以兆豐年尚饗

太原諸廟祈雨文

維皇祐五年歲次癸巳閏七月戊辰朔某日具官某謹
遣某官以清酌之奠致禱于某神某聞天之道主於仁
不則人何以保其生神之道亦主於仁不則人何以通
其誠嗚呼天與神之道皆主于仁矣何一方霜旱之後
既俾其田大茂垂及有年而反枯槁之蝥螻之使民終
日哀祈叫呼冀一施其仁寂然莫應矧某治并始數月

雖然為政一日不合于民宜為天氣之病顧民是何罪
哉是用齋戒省咎將民意以有告于神惟神助天化育
功在祀典哀民之誠迫切如是亟驅風雲沛然下雨掃
滌癘氣銷弭蟲孽則千里之內神一施其仁而瘁死之
苗起為豐穎咨嗟之嘆轉為歡謠民歸神之心何如哉
尚饗

諸廟謝雨文

維皇祐五年歲次癸巳某月某朔某日具官某謹以清

酌庶羞之奠致祭于其神近以秋稼甫成旱蝗萌孽吏
民駭議唯神是歸守臣齋誠亟禱祠下朝奠未縮暮澍
已洽靈應之速實猶影響合境之內鼓舞歡呼知神之
仁益用欽向謹擇良日具馨薦以修報禮惟神冥佑茲
土功德至大亦既拯民之將殞則當俾歲之大獲守臣
何答惟是忠信尚饗

蒙山祈雪文

維皇佑五年歲次癸巳十二月丙申朔二十一日丙辰

具官某謹以清酌庶羞之奠敢昭告于蒙山之神某聞
前代良守長以其部旱暵之為沴也必求境內有聞之
神祈禱之而與神約過期不雨則舉祠燔之雨則葺之
某謂不必然今環晉之境數千里之廣歲將窮而未雪
守臣同民之憂遍禱羣祠逾月弗應聞蒙山晉望也古
有祠俯瞰靈淵自唐以來崇奉祈報民實蒙福今隳圮
垂盡而故址巋然夫祠雖不存山川之神豈嘗亡耶謹
遣某官即壞詞具肴酒以告夫將已意以達于神神祠

之壞而必完之皆守臣之職也答之與否不敢慢神而廢職然神能奮起潛德亟沛惠澤以警一方久不信之民則宜遠邇歸嚮易怠為恭神之威尊與山巍我不然且懼祠雖完而復廢也神聽之乎尚饗

諸廟祈雨文

維皇祐六年歲次甲午正月丙寅朔二十七日壬辰具官某謹遣某官以清酌庶羞之奠有禱于某神去歲歷秋冬逮今雨雪不時降細民駭嗟以田為憂者實半天

下天子惕然引咎齋戒祈禱無所不至而卒未大應今
復時疫暴作民中其疾者十有八九雖星分所次流災
有常而天子慈仁愛民夙夜焦勞守土之臣皆奉命修
職不敢有苛刻之政上病天氣天忍極肆其酷冥然而
不顧哉天道高遠區區草芥之誠固不足以達賴吾境
有靈德之神開發天意轉禍貽福灑甘澤以沃枯壤鼓
和氣而驅癘妖使農及耕耘民安里閭上紓天子旰食
之慮下俾守土之臣省過勤政自新不怠則天施未暢

繫神而啟迪之宜民不怨天而信於神神之功茂矣尚饗

祭告四代祖鼓城府君文

維嘉祐五年歲次庚子某月某朔某日四代孫具官某謹遣男忠彥以清酌庶羞之奠致祭于高祖鼓城府君高祖母夫人張氏之靈琦閱家集見真定主簿張度所撰府君墓銘知天福二年中與夫人同葬於趙州贊皇縣東太平鄉之北馬村當五代之亂天下兵革子孫於

歲時展祀蓋不能及逮今百有餘載遂失訪辨琦自效
官以來志求所在而患不得鄉邑老舊之人以詢究之
今會贊皇人前普州司理鄭嗣宗行服北歸見過私第
問所謂北馬村者乃云所居之地也遂以誠託之未幾
嗣宗復至且言是村有韓評事墓在焉請使家人親驗
某竊念年祀既遠若不一視銘誌則恐後之子孫與鄉
邑遠近之人尚有疑者故遣男忠彥擇日以告暫開墳
隧拂拭誌石使衆目視之釋然必信然後增益封樹以

時致享子孫承之崇奉無窮惟靈鑒此至誠歆此薄薦
毋以輕有犯瀆而賜大咎孝孫之幸也尚饗

祭告四代祖塋土地文

維嘉祐五年歲次庚子某月某朔某日具官某謹遣男
忠彥以清酌之奠昭告于贊皇縣太平鄉北馬村土地
之神高祖鼓城府君之亡實葬茲土子孫遭五代之亂
罔克崇葺各走官路久失訪尋今按文驗之乃得其所
然年祀緬邈人不無疑固當開隧視銘以取衆信惟神

聰直之稟福善而誅惡者也夫有人孝於其親不以百
年之遠力思封樹洒掃以勤時享神宜祐而助之使如
素志不當以輕犯土地而降咎殃則神可謂聰直之全
禍福不私者矣尚饗

祭告五代祖庶子文

維嘉祐八年歲次癸卯三月某朔某日五代孫具官某
謹遣男忠彥以清酌庶羞之奠致祭于五代祖庶子之
靈惟靈厯唐顯官興起韓氏終葬博陸家牒具存某自

從官以來深惟祖先塋域之重雖勤推訪未能辨識數年前始得四代祖鼓城府君之塋於趙州之贊皇至于開隧觀銘衆始大信既以崇葺則益念庶子博陸所葬之地不當無迹會故吏國子博士劉覲通判永寧之任來別遂託尋究未幾得覲書以從姪弁所得二處士埋銘墨本來示閱所叙三代則皆庶子之弟也且言處士墳旁巋然而高草樹蒙翳者疑是庶子之塋也大用感慰故使忠彥不遠千里躬修菲薄之薦而請一視誌文

不獨取信於衆人亦俾裔孫歲歲展祀無有疑惑惟靈鑒此誠懇勿以一時干動神宅而賜大戾尚饗

祭告五代叔祖二處士文

維嘉祐八年歲次癸卯某月某朔某日五代孫具官某謹遣男忠彥以清酌庶羞之奠致祭于五代叔祖處士五代叔祖母夫人之靈某嘗閱家諜知五代祖而上實葬博野年祀殊邈雖勤于推訪大懼不知所在比得從姪弁錄二誌銘來告且言向葺壞墳之所得也詳所叙

三代則二處士乃某五代祖庶子之親弟也不勝驚嘆
慰喜之情故使忠彥擇良日具薄薦完補頽缺再嚴封
樹仍飭子孫歲享祀傳于無窮惟靈歆而監之以重福
于來裔尚饗

祭告永寧軍先塋土地文

維某年某月某朔某日具官某謹以清酌之奠敢昭告
于土地之神某聞山川土地神實主之無名而犯降殃
可也某之五代祖庶子歷唐美官終葬于博野縣之北

原雖距今幾二百年矣比始知其所在若非一視銘誌則裔孫之祀孰不疑而人孰取信哉故遣男忠彥擇日開隧以告于神非無名而犯也惟神稟德聰直故宜助成孝心俾求之不謬其決知乎神不降殃而降福也尚饗

葬安國夫人祭告祖塋文

維嘉祐七年歲次壬寅九月乙巳朔二十三日丁卯孝孫具官某謹以清酌庶羞之奠敢昭告于曾祖令公曾

祖母太夫人烈祖令公祖母太夫人之靈某以新婦安國夫人崔氏之亡取仲冬之二十九日歸葬于相之安陽縣豐安村祖塋西先所得之吉地啟壤之際潔誠以告伏望英靈昭鑒陰為佑助自始興作訖於成役咸得安固永作神居唯子唯孫傳祀無已尚饗

葬安國夫人祭告先塋文

維某年某月某朔某日第六子具官某謹以清酌庶羞之奠敢昭告于先考令公先妣太夫人之靈某以新婦

安國夫人崔氏之亡考經謀葬得百日承凶為吉遂舉
姪殿中丞公彥而下諸喪咸歸葬於相之故里公彥則
開舊壙而納焉姪孫試秘書省校書郎確而下則於大
塋之東別為一域以安之啟壤之始潔誠以告伏望英
靈昭鑒陰為福助宅兆獲安子孫世祀尚饗

安陽集卷四十二

欽定四庫全書薈要卷一萬四千二百十八

集部

安陽集卷四十三

宋 韓琦 撰

祭文

祭龍圖尹公師魯文

維慶厯七年某月某朔某日具官某謹以清酌庶羞之奠
致祭于故龍圖舍人尹公師魯之靈嗚呼師魯惟君之生
天與英竒如鑑之明無隱不窺如材之美無用不宜仁義

之勇過於虎羆疑昧之決審乎著龜首倡古文三代是追
學者翕從聖道乃夷名重天下無人不知知之深者非余
而誰伊昔夏人擾于西垂余忝兵任君實同之周旋塞上
余往君隨晝籌夜畫恐睡恐飢星霜矢石勞苦艱巖凡四
五年心憊形羸退而視君志不少衰上嘉君勤進督渭師
懷敏之後破壞創痍君能盡力補綴撐持曰兵曰民以治
以綏如得父母衆心熙熙保邊務實恥于妄為不合小人
乃啟禍基易慶晉潞奔命何疲輸忠抗論伺者乘危君前

在渭屬防秋時以公解緡貸其偏裨俾償宿負免于典爨
月取其俸送官勿虧且責效命投死無疑職此抵罪竄斥
淪胥衆謂之寃君甘如飴自隨徙均帝方念茲奈何窮山
感疾無醫君決不起指鄧而馳范公大賢來託孤遺謂無
怛化言色怡怡忽整衣冠盥滌莊祗憑几而逝衆皆嘆悲
范公之書其說如斯嗚呼哀哉彼蒼冥冥莫可究推賢者
胡惡動與屯竒不肖胡祐坐來福禧以道而屯死為人思
以幸而福生為人唾在君所得何必期頤嗚呼哀哉余之

與君義雖朋執情則壘篋奠不執紼奠不捧卮使我大恨
痛切肝脾徒憑薄祭一寫哀辭琴不鼓矣嗚呼子期尚饗

祭文正范公文

維某年某月某朔某日具官某謹以清酌庶羞之奠致
祭于資政范公之靈嗚呼哀哉上天生公固為吾宋以
堯舜佐吾君今既忘身而忠國以成康期吾俗兮又竭
思而仁衆升贊樞宰孰云不用殿撫藩服孰云不重何
太平之策噤而不得施兮委經綸於一夢此一人所震

嗟而天下之所深痛豈止乎平生之交得訃音而長慟
嗚呼哀哉僕始立朝接公尚疎道同氣合千里相符忝
帥于西乃與公俱協心畢力誓翦克渠義切王室情均
友于雖千艱而萬險仗忠信而如無僕之望公公驥僕
駑十駕未逮敢擬齊驅人胡不辨遂連公呼自顧無有
愧常汗珠繫公是託終履夷塗叛羌來附一節同趨與
公並命參翊萬樞凡有大事為國遠圖爭而後已歡言
如初指之為黨果如是乎道卒與干時戾謂公迂而僕

愚相緣補外謗毀崎嶇感公之知謂死不渝嗚呼哀哉
定之去青不遐驛置自公之東信問時至愛顧益深交
朋莫二蠅頭細書以時為寄珠貝累幅氣嚴法備自云
矍鑠以將厚意謂公康寧日保純粹忽以疾聞求醫往
視矍然遣使候公鑒寐會公得穎肩輿赴治尚煩公答
親筆數字意公小痊粗以為慰方具書藥詣公所憇得
元規報云公永逝讀之駭然手足俱廢氣填滿膺食不
知味惟公事君之大端固始終而一致有生即有死兮

雖聖智其安避所惜者國家待賢而後又天胡不仁而
不憇遺嗚呼哀哉公之所存履夔蹈高高文奇謀大忠
偉節充塞宇宙照耀日月前不愧于古人後可師于來
哲固有良史直書海內公說亘億萬載不可磨滅此為
夫而為壽兮信識者之能別豈於一奠之間可盡公之
德烈惟是冥然而思默然而悲此生未殞曾無已時公
乎知乎不知

祭僕射王公伯庸文

維嘉祐元年歲次戊戌九月己巳朔某日具官某謹以
清酌庶羞之奠致祭于故僕射王公之靈嗚呼僕與公
交世孰為匹在天聖中考士之實上初臨軒親按程律
公當其選天下第一僕叨次公若甲之乙為合之易公
純我質愛則昆弟同則膠漆從官西東雖遠猶密及佐
大計局相並隣議必聯席食常對茵出入省戶輝光措
紳公踐掖垣文追古醇夫何鄙材復序後陳更直書命
參明帝縉公入禁林朝稱得人僕草公制榮無與倫夏

人擾邊沮我威武僕承人之奮命西禦久之未效命公
來撫公之所臨如旱而雨緊公之略遂振王怒僕時帥
秦公留燕語獨有二天公惠之著疆事之寧僕忝樞輔
公為大農屈事泉布進居公前愧日無措僕斥于外公
方處中排攘羣讒陰存大功僕走二塞身當虜衝一紀
之間莫覩音容天與其幸還趨九重付以舊物本兵之
崇公弼宰政望尊德隆而不大拜反及愚庸僕實無堪
懼顛厥位圖講大寧賴公以濟其道之同言無少異白

髮相親在古無二公歷二府積憂成瘁始疾之微在告而治日須公出以奉醇粹如何決旬遽然永逝嗟乎人生有是不意嗚呼哀哉公之德業海內胥傳清芬雅範則流為世法忠謀大節則詳于史編浩乎若江漢之紀地燦然如日月之麗天此特叙生平之好故舉其槩而不言唯將哀誠一奠几筵公固知我終身愴然尚饗

祭正獻杜公文

維嘉祐二年歲次丁酉二月丁未朔某日具官某謹以

清酌庶羞之奠致祭于司徒侍中杜公之靈嗚呼自公
勇退于今十年天下日思思公至賢故每聞公之病也
衆猶已之病今聞公之亡也則相與駭而嘆曰元老之
喪天下將安所法焉況辱公之知世無比旃雖願百殞
以贖公而莫得兮其哀深痛切非文字之可傳然而因
奠寫誠烏可無說含悲失次舉公大節在祥符初文則
公傑巍取甲科美譽四徹自時為吏天性精勤驅煩判
滯明敏無倫不施鞭朴吏畏如神凡守郡邑政昏日循

凡主財利法皆近仁中司執憲紀律簪紳曰雍曰并乃
國方面命公鎮臨天子安燕上曰公勞來尹畿甸轂下
亟清樞廷是踐公既大任為國圖寧力進忠良正人彙
征時羌之叛與狄連衡公謀廟堂二垂寢兵僥倖路塞
斜封不行有職顯然坐觀太平讒邪狃狃卒壞于成作
相百日彼徒益獍齧公于究公道愈明公則告老上允
其誠旋營厥居處于宋京噫公之貴不與衆類不買田
宅不蓄聲妓蔬食菜羹緼袍布被奉已惟約周人則義

人難其常公行獨易至清之名今昔無二噫公之退與
衆復異慕博不親林泉不嗜枕籍百家沉酣六藝詩筆
日新放懷怡志書法日工或草或隸優游自娛以卒吾
歲嗚呼哀哉公官一品位誠不卑公壽八十年非不耆
在公享之良厚何人心之甚悲蓋以公還事而來精明
不衰憂國之慮過於有政稱善之勤同於已為向使朝
廷重惜公去復公丞疑以十餘歲之康寧翼億萬世之
丕基則治胡為而不唐虞公胡為而不臯夔噫衆願之

終戾兮不繫公而繫時徒憑使人酌公一卮公乎公乎
已而已而尚饗

祭狄相文

維嘉祐二年歲次丁酉四月丙午朔十六日辛酉具官
某謹以清酌庶羞之奠致祭於故相狄公之靈惟靈忠
孝沉厚出於天資威名方略聳於塞外入登樞府蓋旌
勲勞出殿輔藩聊遂偃息何五福所鍾而不與其壽一
人所悼者未盡其才某向處邊垂公實裨佐自聞傾喪

日極哀懷茲承已擇良辰權厝淨宇敢憑薄酌少致哀
誠魂兮有知諒垂歆監尚饗

祭聳隅先生文

維嘉祐三年歲次戊戌十月戊戌朔十日丁未具官某
謹以清酌庶羞之奠致祭于聳隅先生黃君之靈先生
以學自富以道自貴身居草萊名暴天下公卿大夫知
先生之賢薦先生之晚老得一命遽然而亡嗚呼豈天
之於人既使其學與道之不窮也則其身也固不可得

其不窮耶不然何屯梗沮屈之如是乎某忝大任竊重祿不能極力推挽使先生之學之道少伸于時而身為不窮反咨嗟疑天不自引咎誠罪人也今先生之子能奉遺書謹遺法介然以不墜先業為意護喪南歸得舟東下因致薄酌一道哀愧之誠先生宜來歆是精潔尚饗

祭范寬之刑部文

維嘉祐七年歲次壬寅五月丁未朔十五日辛酉具官

某謹遣某人以清酌庶羞之奠致祭于范郎刑部之靈
君之于余兄之子壻而余姪女不幸早世親知之深義
無少替垂三十年意愛交至君提國憲向領全吳察廉
之失屢經赦書復久去官攻者終誣降漕得守遂觀濠
魚中外交章辨君非辜牽復甚邇君胡遽殂嗚呼哀哉
君始得疾殆於累月度不能起尚記踈拙請兄援毫寓
書以訣惟草二名親筆余別余一閱之夙夜悲咽其間
一事余竊為疑云分毫恩未嘗及之余之知君惟道是

期所謂恩者有公有私私則結好死焉莫移公敢市寵
非余之為嗚呼哀哉君之平生志氣豪邁臨終之言何
近狹隘得非有激其意安在俾余恤孤余安敢怠千里
致哀惟憑薄酌英特之魂宜乎不昧尚饗

祭文潞公太夫人文

維嘉祐八年歲次癸卯二月某朔某日具官某謹遣門
人陳諤以清酌庶羞之奠致祭于魯國太夫人之靈惟
靈早孀君子克謹婦道闈內之訓莫匪忠孝有子逢辰

相吾大君膚公盛德世無與倫勤哉奉親繫我賢相晨
夕旨甘得謂榮養享封大國禴翟魚軒康寧壽考五福
之全相君承顏以懼以喜請治于洛歸來鄉里慰我高
堂鼓鐘笙簧大期之及怡然而亡琦於相君義則兄弟
何以致哀是惟薄祭尚饗

祭崔良孺殿丞文

維治平元年歲次甲辰九月癸亥朔二日甲子具官某
謹以清酌庶羞之奠致祭于殿丞崔君十哥之靈惟君

之稟天與和粹大韶之發聽者忘味大圭之全瑩爾君
瑞君父正臣始終道義君兄節士瓌特其志君之漸摩
固無不備惟文之高乃不中第惟才之敏見於為吏其
勢奔騰譬若良驥千里之遙旦暮可至奈何半途遽爾
顛躓惟余之室君則其弟余契之篤實均同氣君如京
師必館而憩歡然相接唯恐分袂今夏之首君來審官
待次得告再歸闕田初聞小疾勿藥當痊遂不裁問日
期駕旋使忽至止君兄惠牋具述君病且憂纏綿余驚

呼醫俾馳詣前醫馳未達訃來何遑嗚呼哀哉君之德
美稔于衆傳復被餘慶宜熾而延何未強仕倏茲溘然
命也孰訴噫嘻蒼天嗚呼哀哉君姊之亡傷摧二年又
感君感心如灼燃徒憑薄酌致此拳拳哀誠千百未能
一宣君其知乎歆余意焉尚饗

安陽集卷四十三

謹案卷四十一第五頁前八行纂隆皇緒刊本纂
譌募今改

第八頁後八行有一朝而掃迹刊本掃訛歸今改



總校官庶吉士臣 侍 朝

校對官庶吉士臣 陳崇本

謄錄監生臣 宣葆光

謄錄監生臣 王世臣

欽定四庫全書薈要

集部

安陽集卷四十六

四至

詳校官助教臣常循



欽定四庫全書薈要卷一萬四千二百十九

集部

安陽集卷四十四

宋 韓琦 撰

祭文

祭資政吳長文文

維熙寧元年歲次戊申十月庚子朔某日具位某謹遣
人以清酌庶羞之奠致祭于大資政吳公侍郎之靈惟
公之生得道之粹惟公之出為世之瑞粵在妙齡已彰

奇器六經深醇諸子同異下逮百家史氏所志經公一覽則能誦記學優而仕進道益勤遂塞詔舉大名是振仁廟知公擢公諫臣聳激忠義漸摩聖神致我后德大猷日新領漕東南使煩以試屬部一清何止經計更殿鉅藩所至稱治風績藹然實冠循吏西掖代言北門典制號令文章一時溫麗翼翼京邑則于四方帝曰疇尹惟公是當大豪兼并過于寇攘公暴其罪投之遠荒姦盜四走壞其橐囊高視前輩為宋趙張上曰公賢贊我

幾命協心憂國大本以定俄執親喪毀幾滅性茹蔬泣
血卒羸而病服除還位亟叅大政真儒秉鈞內外交慶
任直為輔忘身匪艱辨白君道呵排大姦義貫白日名
高太山退處于外孤風孰攀公往治青余趨雍部遐辱
惠音道其雅素且曰吾疾庸醫所誤今雖調適未甚如
故余病亦久勉而作書馳走一介候公起居回得公荅
慰吾勤渠親翰累幅筆精有餘余喜料公其疹必除命
世之佐百靈所扶嗚呼哀哉書來未旬余徙鄉郡復促

召車因令入覲道聞公訃心臆摧震天乎人乎杳默奚
訊善人云亡乃邦之釁公如可贖余義當徇雖百其殞
夫亦何吝嗚呼哀哉歷代已往如公幾人萬世在後公
名永存孰壽孰夭此安足論惟是餘慶宜昌子孫何以
致哀奠公一樽公來歆乎公靈者魂嗚呼哀哉尚饗

祭安退先生劉君文

維熙寧元年歲次戊申八月某朔某日具官某謹以清
酌庶羞之奠致祭于故安退先生劉君之靈嗚呼先生

剛介之性天下能合者有幾淵源之學古人不到者甚
多憤然不少屈於世兮遂樂窮處唯酣杯而放歌晚而
絕寂棄置家事欲融怡於太和澹然如此而天猶不祐
兮歎倏隨於逝波余方罷西帥還故鄴借號塗而亟過
瞻先生之墳土未乾兮不能一奠于山阿徒遣使指陳
薄奠以將其意也嗚呼先生其知余之悲乎奈何奈何
尚饗

祭崔公孺比部文

維熙寧四年歲次辛亥某月某日具官某謹以清酌庶
羞之奠致祭于故崔君比部九哥之靈余初及冠作壻
君門君時妙年德性已尊不事彫琢歸乎質渾博覽經
史富于藝文恥在蔭籍思同後羣射策不偶遂遺世紛
西竺大法南京祕源旁逮莊老虛無之言沉酣貫穿洞
其本根顧視軒冕淡如浮雲勉而為吏非志所存粗以
庇族仁風是惇間常詣我情均弟昆酒會歡密詩豪放
奔時擿道奧開聾破昏益我多矣如猶附薰余視君為

期諸古人如何奄忽遽罹大屯善良至此天也寧論泣
馳使指奠酌一樽君子乎來歆惟靈者魂尚饗

祭致政學士趙君子淵文

維熙寧四年歲次辛亥八月癸丑朔某日具官某謹遣
三班奉職隨行指使張世昌以清酌庶羞之奠致祭于
故致政學士趙君子淵之靈嗚呼僕與君交心照莫二
論契之深同門之壻在明道初禁林並試聯陟道山日
親高誼直則同舍分則同氣譬若驥騄方駕平地欲騁

千里自當齊至如何遲速半塗而異君知命者未始較
計嗟君之才畜不大施歷殿藩府所在循吏晚求西臺
亟謝君事惟洛之都有完者第方期優游遂我高志不
虞安休乃失頤衛使人遠來諭我疾勢駭而馳醫往道
勤意醫纔及門而君已逝嗚呼哀哉年踰七十壽足為
貴諸子宦達實昌而熾進揚令名退絕纖累君之始終
可謂無媿而余悲者義切親懿聲顏永絕翰墨徒秘緋
不親執奠不躬致臨風長號涕泗交墜惟憑一介具此

薄祭冥冥有知為我來暨尚饗

祭少師歐陽永叔文

維熙寧五年歲次壬子某月某日具官某謹遣三班奉
職隨行李珪以清酌庶羞之奠致祭于少師永叔之靈
惟公之生粹稟元精偶聖而出逢辰以亨厯事三朝翼
登太平大名既遂大功既成年未及老深虞滿盈連章
得謝穎第來寧神當畀以福祿天宜錫之壽齡胡不憇
遺遽爾摧傾此冥理莫得致詰而天下為之失聲嗚呼

哀哉公之文章獨步當世子長退之偉瞻閱肆曠無擬
倫逮公始繼自唐之哀文弱無氣降及五代愈極頽敝
惟公振之坐還醇粹復古之功在時莫二公雖云亡其
傳益貴譬如天衢森布列緯海內瞻仰日高而熾公之
諫諍務傾大忠在慶厯初職司帝聰顏有必犯闕無不
縫正路斯闢姦萌輒攻氣勁忘忤行孤少同於穆仁廟
誠推至公孰好孰惡是焉則從善得盡納治隨以隆人
畏清議知時不容各礪名節恬乎處躬二十年間由公

變風公之功業其大可記屢殿藩垣所至懷惠嘗尹京
邑沛有餘地早踐西掖晚當內制凡厥代言典謨之懿
凡厥出令風雷其勢三代炳焉公辭無媿樞幄猷為台
衡弼貳撫御四夷兵戈不試整齊百度官師咸治服勞
一心定策二帝中外以安神人胥慰不校讒言懇求去
位公之進退遠邁前賢合既不苟高惟戒顛身雖公輔
志則林泉七十致政乃先五年上惜其去公祈益堅卒
遂其請始終克全嗚呼哀哉余早接公道同氣類出處

雖殊趣向何異暨忝宰司日親高誼可否明白襟懷坦
易事貴窮理言無飾偽或不知公因懼謗忌青蠅好點
白璧奚累嗚呼哀哉自公還事心慕神馳徒憑翰墨莫
挹姿儀公嘗顧我惠以新詩雖亟訓答奈苦衰疲欲復
為問動已踰時忽承訃音且駭且悲哀誠孰訴肝膽幾
隳公之逝矣世鮮余知不如從公焉用生為遐修薄薦
奠公一卮魂兮有靈其來監茲尚饗

安陽集卷四十四

欽定四庫全書薈要卷一萬四千二百二十

集部

安陽集卷四十五

宋 韓琦 撰

挽辭

章獻明肅皇太后挽辭二首

一紀裨鴻化千齡從列仙至仁高協帝厚德遠參乾驗
寡親嘗藥恩深欲報天為殫臣庶淚朝雨助潜然

璿駕方修祀金波忽墜空悲歌傳薤露祕殿聞椒風霧

重昏軒曜雲悽泣舜瞳仙輿邈何處天外藥珠宮

章懿皇太后輓辭二首

外族傳仙系中閨著德容瑞符衣覆玉懿範史編彤天
闊雲埋仗秋高露泣松宸心望歸駕滄海晦三峰

夢日推祥舊儀坤講禮新帝親無及養天意此何仁宮
寢延嵩月禕褕寓洛塵欲知仁主孝淚血送龍輜

章惠皇太后輓辭二首

椒掖遺芳在龜臺別信空舊恩緣服重新廟見慈同殘

月無多夜餘花一向風徽音從此斷
恐顧洛川東
柔順符坤德興居監女箴笥衣裙有練殿壁帶無金外
族疏恩薄中宸結愛深宮娥齊飲淚誰副祝延心

仁宗皇帝輓詞三首

道久民胥化幾先慮極深勤邦循禹度傳聖得堯心生
德齊天地仁聲振古今三山神藥在滄海信空沈
薄葬定隣邊民安即舊廛大非容六馬深不錮三泉恐
逐宮車出翻隨玉輅旋西都無限竹淚色自湘川

聖治方無事仙游遽不還
心休黃屋外鄉遠白雲間
笳鼓悽寒月旌旗卷暮關
孤臣期得殉黃鳥願重刪

英宗皇帝輓詞三首

遽委飛乾運應開出震符
子方批鳳尾天已下龍胡
過密思堯治謳歌起舜圖
只留勤儉德千古亘三無

此日天無色輜車下禁宸
悲風隨去仗哀淚裛行塵
一閉皇堂夜長閑御寢春
守陵來有幾蕭索慶寧人

蜃駕雖停洛颿輿已遡
天空藏軒劍鳥不改霸山
川挽

揭秋聲外旌翻夕照前老臣非從死何路答知憐

司徒侍中杜公輓詞三首

早退輕高位孤風振昔賢上思終不已民望日依然榮
寵三增秩優游十換年諸看良史舊德孰似公全

直道當年梗清名萬世師身閑心在國跡退德高時警
絕新詩雅飛騰老筆奇歸休何所樂持此造希夷

哲人何永逝天理此難忱子謹新遺札家無舊賜金可
傳清白業未足太平心訃至悲尤動忘年顧遇深

僕射王公輓詞三首

早冠廉良選尋專翰墨盟上知唯直道人愛是純誠樞
極權無撓台衡論必平嗚呼今已矣天不為蒼生

公昔魁多士余時托後塵交因荷心照義實過天倫進
始欣連茹官終媿積薪牙絃茲遂絕不見賞音人

相府陪高議於時適共榮開懷叙疇昔協力冀登平幾
日違言笑何期隔死生寢門長慟後追愴不勝情

張汝士寺丞輓辭二首

昔與君遊者芝蘭久更芳高懷澄水月和氣燠春陽陳
迹川流遠嘉名歲景長平生歐尹友嘗歎善人亡

滿腹康時業丁年未一伸方從中洛掾俄掩北邙塵有
子賢荀里登科感孟鄰新阡伊闕下長得塞門春

塞門地名

江西提點刑獄閻顥郎中輓詞一首

昔忝中山帥君時佐郡條協心圖治俗同榜喜為僚方
卜門容駟俄驚坐賦鴉新阡思一慟西蜀奈迢遙

致政王子融侍郎輓詞三首

公昔求還事年猶未縱心軒裳輕俗累水月瑩禪襟樂
任荒三徑閑時戲一禽陶然踰五閏已矣世同欽

伯氏勲名永繇公左右然賢碑求帝篆行錄廣時傳餘
範光門法遺文祭史編欲知天報厚五福賜君全

昔貳淄川政嘗依大守賢于門欽世德阮巷泰親聯僕
始慙當軸公方遂引年音容俄永隔拄泣望新阡

太尉侍中宋公輓辭三首

科等魁髦彥文章壓縉紳大權更將相優寵極人臣還

事至一品享年踰七旬請看今與昔誰可望公隣
仁皇求治始公出冠儒英仕路知卿相時名獨弟兄兩
朝推重德當世服純誠身後傳家者羣書但滿篋
注想尊元老云亡歎哲人恤章隆上袞哀輓出中宸史
入經綸迹文藏造化神笳簫陽翟路行者亦沾巾

蘇洵員外輓詞二首

對未延宣室文嘗薦子虛書方就綿蕝奠已致生芻故
國悲雲棧英游負石渠名儒升用晚厚愧不先予

族本西州望來為上國光文章追典誥議論極皇王美
德驚埋玉瓌材痛壞梁時名誰可嗣父子盡賢良

太尉呂公輓詞二首

韋平傳慶裔方召起隆名塞上天聲遠帷中廟奠精衆
期調玉鉉時忽喪金城朝野悲何甚邦家重老成

要劇更中外幾微照古今嘉謀增國重和氣入人深龍
已須雲起星俄向壘沈得名非得壽天報此難忱

安陽集卷四十五